



Bentiaraq Ottosen  
Atassut

UKA 2023/9  
27. oktober 2023

**Inatsisartut Ombudsmandiata 2022-imut ukiumoortumik nalunaarutaata**  
**Inatsisartunit tusaatissatut tiguneqarnissaanik Inatsisartut**  
**aalajangiiffisassaattut siunnersuut.**  
(Inatsisinut ataatsimiititaliaq)

### **Siullermeernera**

Inatsisartut ombudsmandiata 2022-imut ukiumoortumik nalunaarutaa saqqummiunneqarneranut qujavugut. Atassummiillu imaattumik oqaaseqarfigissallugu.

Soorunalimi pingaaruteqaqaaq ingerlatsiviit pitsaasumik ingerlanissaat anguneqartassasoq, kisiannilu pinngitsoorneqarsinnaangilaq Inatsisartut ombudsmandiata suliassai imaanaangitsut qaqiortorneqartarnissaat maani inersuarmi.

Siullertut maluniakkatta ilagaat naammagittaalliuutit suliassallu assigiinngitsut inummut ataatsimut tunngaveqarsinnaasut qaqilerneqartarneri. Tamannalu takornartaangilaq, kisiat maanna saqqummiussisutini saqqummiunneqartut eqqarsaatigalugit Inatsisartut ombudsmandiata saqqummiussai quppernerit 25-32-imut saqqummiunneqarput tassungalu tunngatillugu meeqqanut tunngasut isumaqarpunga aaqqittariaqavissortut, pissutigalugu inatsisit tunngavilersuutigineqartut naapertorlugit nalilersuinerit akuersaarneqarsinnaangimmata. Maluginiarparput qeqqata kommuniata meeqqat tapersersorteqartarnerat pillugu suliamik aallartitsisoqarsimasoq tamannalu sularinninnera akuersaarneqarsinnaangitsaq. Tamakkua eqqarsaatigalugit ukiuni kingullernili suliut uteqqiattutut isikkullit isumaqarpunga allangortilluinnartariaqartut, qaquguuna pisortat pitsaannerusumik suliaqalerniartut. Pissutigalugu ukiorpasuanngortuni nalunaarutit pillugit suliaqartoqartillugu ajornartorsiutit asseqqissai saqqummiunneqartartut, kisiat piffimmut allamut nuulaaginnarlutik.

Ajornartorsiutit qaangerneqassappata pikkoriffiginerusariaqakkatta ilagilluinnarpaat kommune-t qanimut suleqatiserinerisigut suliassaq kivitassaq sularineqarnissaa, kisiannili eqqaamassarput qitiusumiit aqutsinerujussuaq killormut aallasatsitisinnaammat. Qitiusumiit aqutsineq allaffissornerujussuarmik pilersitsisarnera Atassummiit akuersaarsinnaangilarput, eqqaamaquarpullu tamakkua nalunaarutit eqqarsaatigalugit pitsannerusumik oqartussaaffigisatta iluani inatsisiliortariaqartugut. Inatsit kikkunnulluuniit aporaaffiunngitsaq ersarissaq, inatsisit assigiinngitsut ersarissarneqartariaqartut Atassummiit isumaqarpugut. Pissutigalugu nalunaarutit taakkua uteqqittuutut inatsisit aallaavigalugit nalimmassarneqartariaqarmata.

Taamatut oqaaseqarluta Inatsisartut Ombudsmandiata nalunaarutaa tusaatissatut tiguarpur.